

四庫全書

集部

欽定四庫全書

集部
唐詩紀事卷四十六

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣劉紳

謄錄監生臣劉能

欽定四庫全書

唐詩紀事卷四十六

宋 計敏夫 撰

劉言史

劉猛

李餘

李涉

劉昭禹

孫昌胤

嚴休復

朱慶餘

劉軻

獨孤鉉

張燦

楊虞卿

楊汝士

張志和

劉言史

竹裏梅花云竹裏梅花相並枝梅花正發竹枝垂風吹總

向竹枝上直似王家雪下時

春過趙墟有作云下馬邯鄲陌頭歇寂寥崩隧臨車轍
古栢重生枝亦乾餘漆見風幽燄滅白蒿微發紫椹新
行人感此復悲春

初下東周贈孟郊云鶴老耳更工龜死殼亦靈正信非
外泂終始全本情童子不戲塵積書就崑崙身著木菜
衣養鹿兼犇耕偶隨下山雲荏苒失故程漸入機險中
危思難太行十髮九縷絲悠然東周城言詞野麋態出

口多累刑因依漢元察似羈細輕冷竈助新熱靜砧與
寒聲清斷蓬在門欄豈當桃李榮寄食若蠹虫侵損利
微生固非拙為強懦劣寂寥并素堅冰蘖心潔持保堅
貞修文返正風刊字齊古經慙將衰末分高棲喧世名
過春秋峽云峭壁蒼蒼苔色新無風晴景自勝春不知
何樹幽崖裏臘月開花似北人

長門怨云獨坐爐邊結夜愁暫時思去亦難收手持金
筋垂紅淚亂撥寒灰不舉頭

樂府新詞云花顏鬢髮一何偏
綠槐香陌欲朝天仍嫌
衆裏嬌行疾傍鐙深藏白玉鞭

噴沫團香小桂條玉鞭兼賜霍嫖姚
弄影便從天禁出
碧蹄聲碎五門橋

廣州王園寺伏日即事寄北中親友
云南越逢初伏東
林度一朝曲池煎畏景高閣絕微颺
竹簟移先灑蒲葵
破復搖地偏毛瘴近山毒火威饒
衰汗絺如濯親床枕
並燒墮枝傷翠羽
萎荼惜紅蕉且困流金熾
難成獨酌

謠望霖窺潤礎思吹候生條旅恨生烏澣鄉心繫洛橋
誰憐在炎客一夕壯容銷

言史與孟東野友善詩中有貝州召郊之作又有金陵
瀟湘之遊廣州贈北中親友詩蓋言史平生所經歷處
東野哭言史詩云精異劉言史詩腸傾珠珂取此為拋
擲飛過東溟波可惜大國謠颺爲四夷歌常於衆中會
顏色兩蹉跎今日果成死葬喪之洛河

言史送婆羅門歸本國詩云剎利王孫字迦攝竹錐橫

寫吒蘿茶遙知漢地未有經手牽白馬遶天行龜茲磧
西胡雪黑大師凍死來不得地盡年深始到船海裏更
行三十國行多耳斷金環落冉冉悠悠不停脚馬死經
留却去時往來應盡一生期出漢獨行人絕處磧西天
漏雨絲絲

瀟湘遊云夷女采山蕉緝紗浸江水野花滿髻妝色新
閑歌款乃深峽裏款乃知從何處生當時泣舜腸斷聲
翠華寂寞嬋娟沒野篠空餘紅淚情青煙冥冥覆杉桂

崖壁麥天風雨細昔人幽恨此地遺綠芳紅豔含怨姿
清猿未盡魍鼠切汨水流到湘妃祠北人莫作瀟湘遊
九疑雲入蒼梧愁

放螢怨云放螢去不須留聚時年少今白頭架中科斗
萬餘卷一字千回重照見青雲香耿不可親開囊欲放
增餘怨且逍遙還酌酎仲舒漫不窺園井那將寂寞老
病身更就微虫借光影欲放時泪沾裳衝籬落千點光
觀繩伎云秦陵遺樂何最珍綵繩冉冉天仙人廣場寒

食風日好百夫伐鼓錦臂新銀畫青綃抹雲髮高處綺
羅香更切重肩接立三四層著屐背行仍應節兩邊圓
劍漸相迎側身交步何輕盈閃然欲落却收得萬人肉
上寒毛生危機險勢無不有倒掛纖腰學垂柳下來一
一芙蓉姿粉薄鈿稀態轉竒坐中還有沾巾者曾見先

皇初教時

潞府李相
公席上作

買花謠云杜陵村人不田穡入谷經谿復緣壁每至南
山草木春即向侯家取金碧幽豔凝花春景曙採來移

得將何處蝶惜芳叢送下山尋斷孤香始回去豪少居
連鳩鵲東千金使買一株紅院多花少栽未得零落綠
娥纖指中咸陽親戚長安里無限將金買花子澆紅濕
綠千萬家青絲玉轡聲啞啞

王中丞宅夜觀舞胡騰云石國胡兒人見少蹲舞樽前
急如鳥織成蕃帽虛頂尖細氎胡衫雙袖小手中拋下
蒲萄盞西顧忽思鄉路遠跳身轉轂寶帶鳴弄腳續紛
錦靴軟四座無言皆瞪目橫笛琵琶遍頭促亂騰新毯

雪朱毛傍拂輕花下紅燭酒闌舞罷絲管絕木槿花西

見殘月

王中丞
武俊也

皮日休劉棗強碑文云歌詩之風蕩來久矣大抵喪于南朝壞于陳叔寶然今之業是者苟不能求古於建安即江左矣苟不能求麗於江左即南朝矣或過為豔傷麗病者即南朝之罪人也吾唐來有是業者言出天地外思出鬼神表讀之則神馳八極測之則心懷四溟磊磊落落真非世間語者有李太白百歲有是業者彫金

篆玉牢竒籠怪百鍛為字千練成句雖不追躅太白亦
後來之佳作也有與李賀同時有劉棗強馬先生姓劉
氏名言史不詳其鄉里所有歌詩千首其美麗恢瞻自
賀外世莫得比王武俊之節制鎮冀也先生造之武俊
雄健頗好詞藝一見先生遂加異敬將署之賓位先生
辭免武俊善騎射載先生以貳乘逞其藝如野武俊先
騎驚雙鴨起於蒲稗間武俊控弦不再發雙鴨聯斃於
地武俊歡甚命先生曰某之伎如是先生之詞如是可

謂文武之會矣何不一言以讚耶先生由是馬上草射
鴨歌以示武俊議者以為禰正平鸚鵡賦之類也武俊
益重先生由是奏請官先生詔授棗強令先生辭疾不
就世重之曰劉棗強亦如范萊蕪之類焉故相國隴西
公夷簡之節度漢南也少與先生遊且思相見命列將
以襄之髹器千事賂武俊以請先生武俊許之先生由
是為漢朝相府賓冠隴西公日與之為筵宴其獻酬之
歌詩大播於當時隴西公從事或曰以某下走之才誠

不足污辱重地劉棗強至衆必以公賓劉於幕吏之上
何抑之如是公曰愚非惜幕間一足地不容劉也然視
其狀有不足稱者諸公視某與劉分豈有間然哉反為
之惜其壽爾後不得已問先生所欲為先生曰司功掾
甚閑或可承闕相國由是掾之雖居官曹宴見與從事
儀等後從事又曰劉棗強縱不容在賓署承乏於掾曹
誣矣奚不䟽整其秩相國不得已而表奏焉詔下之日
先生不恙而卒相國哀之慟曰果然止掾曹然吾愛客

葬之有加等墳去襄陽郭五里曰柳子闕後先生數十
歲日休始以鄙文稱於襄陽襄陽邑人劉求高士也嘗
述先生之道業嘗咏先生之歌詩且歎曰襄之人只知
有浩然墓不知有先生墓恐百歲之後埋滅而不聞與
荆棘凡骨溷吾子之文吾當刊焉日休自存既摭實錄
之何愧嗚呼先生之官卑不稱其德宜加私謚然棗強
之號世已美矣故不加焉是為劉棗強碑

劉猛

元微之樂府古題序云詩訖於周離騷訖於楚是後詩
之流為二十四名賦頌銘贊文誄箴詩行咏吟題怨歎
章篇操引謠謳歌曲詞調皆詩人六義之餘而作者之
旨由操而下八名皆起於郊祭軍賓吉凶苦樂之際在
審聲以度詞審調以節唱句度短長之數聲律平上之
差莫不由之准度而又區別其在琴瑟者為操引採民
眊者為謳謠備曲度者摠得謂之歌曲詞調斯皆由樂
以定詞非選詞以配樂也由詩而下九名皆屬事而作

雖題號不同而悉謂之為詩可也後之審樂者往往採
取其詞度為歌曲蓋選詞以配樂非由樂以定詞也而
纂撰者由詩而下十七名盡編為樂府等題除饒吹橫
吹郊祀清商等詞在樂志者其餘木蘭仲卿四愁七哀
之輩亦未必盡播於管弦明矣後之文人達樂者少不
復如是配列但遇興紀題往往兼以句讀短長於歌詩
之異劉補闕云樂府肇於漢魏按仲尼學文王操伯牙
作水僊操齊犢沐作雉朝飛衛女作思歸引則不於漢

魏而後始亦以明矣况自風雅至於樂流莫非諷興當時之事以貽後世之人公襲古題唱和重複於文或有短長於義咸為贅媵尚不如寓意古題刺美見事猶有詩人引古以諷之義者焉曹劉沈鮑之徒時得如此亦復稀少近代惟詩人杜甫悲陳陶哀江頭兵馬麗人等凡所歌行率皆即事名篇無有倚傍余少時與友人白樂天李公垂輩謂是為當遂不復擬賦古題昨梁州見進士劉猛李餘各賦古樂府詩數十首中一二章咸有

新意予因選而和之其有雖用古題全無古義者若出門行不言離別將進酒特書列女之類是也其或頗同古義全創新詞則田家止述軍輸捉捕詞先螻蟻之類是也劉李二子方將極意於斯文因為粗明古今歌詩同異之旨焉

月生十五前日望光彩圓明滿十五後日畏光彩瘦不見夜光色一罇成暗酒匣中苔背銅光短不照空不惜補明月暫無此良玉

月生句

自念數年間兩手中藏鈎於

心且無恨他日為我羞古老傳童歌連淫亦兵象夜夢

戈甲鳴苦不願年長

苦雨句

朝梳一把白夜淚千滴雨可

耻垂拱時老作在家女

曉句

張為作主客圖取猛月生十五前等句以孟雲卿為高古奧逸主而以猛為入室

元微之酬劉猛見送云種花有顏色異色即為妖養鳥惡羽翮翮不待高非無剪傷者物性難自逃百足雖健健商羊亦翹翹伊予狷然質謬入多士朝任氣有悞

戇容身寡朋曹愚狂偶以直靜僻非敢驕一為毫髮忤
十載山川遙爍鐵不在火割肌不在刀險心露山岳詖
語翻波濤六尺安敢主方寸由自調神劔土不蝕異布
火不燒雖無二物姿庶欲效一毫未能深感感多謝相
勞勞去去我移馬遲遲君過橋雲勢正橫壑江流初滿
槽持此慰遠道比之為舊交

李餘

張為作主客圖以孟雲卿為高古奧逸主以餘為入室

取其句云長安東門別立馬生白髮句霽後軒蓋繁南

山瑞煙發句嘗憂車馬繁土薄聞水聲句

餘登長慶三年進士第蜀人也張籍送餘歸蜀詩云十
年人詠好詩章今日成名出舉場歸去唯將新誥牒後
來爭取舊衣裳山橋曉上蕉花暗水店晴看芋葉光鄉
里親情相見日一時携酒上高堂

賈島送餘及弟歸蜀云知音仲久屈覲省去光輝津濟
逢清夜途程盡翠微雲當綿竹疊鳥離錦江飛肯寄書

來否原居出甚稀

又送餘往湖南云昔去候溫涼秋生滿蜀鄉今來從辟
命春物遍涪陽岳石桂陽雪野帆堆渚檣若尋吾祖宅
寂寞在瀟湘

李涉

石本作李涉鎮江鶴林寺
有坡詩同刻有玉蕊花在

醉中贈崔膺云與君兄弟匡嶺故與君相逢楊子渡白
浪南分吳塞寒綠楊深入隋宮路隋家文物今雖改舞
館歌臺基尚在煬帝陵邊草木深汴河流水空歸海古

今悠悠人自別此地繁華終未歇大道青樓夾翠煙瓊
墀繡帳開明月與君一言兩相許外捨形骸中爾女楊
州歌酒不可追洛神映箔湘妃語白馬黃金為身置誰
能獨羨他人醉暫到香爐一夕間能展愁眉百世事君
看白日光如箭一度別來顏色變早謀侯印佩腰間莫
遣看花鬢如霰

題鶴林寺僧室云終日昏昏醉夢間忽聞春盡強登山
因過竹院逢僧話又得浮生半日閑

春晚遊鶴林寺寄使府諸公云野寺尋春花已遲背嶺
唯有兩三枝平生携酒猶堪醉為報春風且莫吹

岳陽別張祜云十年蹭蹬為逐臣鬢毛白盡巴江春鹿
鳴猿嘯雖寂寞水蛟山魅多精神山瘡困中聞有赦死
灰不望光陰借半夜州符喚牧童虛教衰病生驚怕巫
峽洞庭千里餘巖陬水國何親踈由來真宰不宰我徒
勞歎者懷吹噓灞橋昔與張生別萬變桑田何處說龍
蛇縱在沒泥塗長衢却為駕駘設愛君氣堅風骨峭文

章真把江淹笑洛下諸生懼刺先烏鳶不得齊鷹鷂岳
陽西南湖上寺水閣松房遍文字新釘張生一首詩自
餘吟着皆無味策馬前途須努力莫學龍鍾虛嘆息
晚泊潤州聞角云孤城吹角水茫茫風引胡笳怨思長
驚起暮天沙上鴈海門斜去兩三行

涉嘗過九江至皖口遇盜問何人從者曰李博士也其
豪首曰若是李涉博士不用剽奪久聞詩名願題一篇
足矣涉贈一絕云春雨蕭蕭江上村綠林豪客夜知聞

他時不用相迴避世上如今半是君

涉至楊州一女子拜且泣問之曰宋態也故吳興劉員

外之愛姬

劉全白也

劉李有昔年之分涉因贈詩曰長憶雲

仙至小時芙蓉頭上綰青絲當時驚覺高唐夢唯有而
今宋玉知又云陵陽夜醮使君筵解語花枝在眼前自
從明月西沉海不見嫦娥二十年

涉渤之兄織人也早從陳許辟憲宗時為太子通事舍
人投匭言吐突承璀寃狀孔戣知匭事表其姦逐為峽

州司倉參軍始幾見其副章詰責不受涉乃行賂詣光
順門通之故幾極言涉姦險欺天請加顯戮大和中為
太學博士自號清谿子

張為作主客圖以孟雲卿為高古奧逸主而以涉入室
取其句云但將鐘鼓悅私愛肯以兵戈為國羞句尼父
未適魯屢屢倦迷津徒懷教化心紆鬱不能伸一遇知
已言萬方始喧喧至今百王則孰不挹其源句

六歎云漢臣一没丁零塞牧羊西過陰沙外朝憑南鴈

信難回夜望北辰心獨在漢家茅土橫九州高門長戟
分王侯但將鐘鼓悅私愛肯以兵戈為國羞夜霜寒雲
卧冰雪嚴風觸刃垂旌節丁年奉使白頭歸泣盡李陵
衣上血

春山三竭來云釣魚竭來春日暖松溪不厭舟行緩野
竹初栽碧玉長澄潭欲下青絲短昔人避世無避仇暮
棲雲外無悠悠我今無事亦如此赤鯉忽到長竿頭汎
汎隨波凡幾里碧莎如煙沙似砥瘦壁橫空怪石危山

花鬪日禽爭水有時帶月歸扣舷身閑自是漁家仙
山上竭來採新茗新花亂發前山頂瓊英動搖鍾乳碧
叢叢高下隨崖嶺未必蓬萊有仙藥能向崑中雲漠漠
越甌遙見裂鼻香欲覺身輕騎白鶴

採藥竭來藥苗盛藥生只傍行人徑世人重耳不重目
指似藥苗心不足野客住山三十載妻兒共寄浮雲外
小男學語便分別已辯君臣知匹配都市廣長開大鋪
疾來求者多相悞見說韓康舊姓名識之不識先相怒

劉昭禹

經費冠鄉舊隱云節高終不起死戀九華山聖主情何
切孤雲性本閑名傳中國外墳在亂松間依約曾棲處
斜陽鳥自還

昭禹字休明婺州人也少師林寬為詩刻苦風雪詩云
向向夜深得心從天外歸

集首懷華山隱者云先生入太華杳杳絕良音秋夢有
時見孤雲無處尋神清峯頂立衣冷瀑泉吟應笑千名

者六街塵土深

嘗與人論詩曰五言如四十箇賢人著一字如屠沽不
得覓句者若掘得玉合子底必有蓋但精心求之必獲
其實在湖南累為宰字後署天策府學士嚴州刺史卒
於桂州幕中有詩三百首

孫昌胤

清明詩曰清明暮春裏悵望北山陲燧火開新焰桐花
發故枝沉冥慙歲物歡宴阻朋知不及林間鳥遷喬並

羽儀

和司空曙劉昫虛九日送人云京邑歎離羣江樓喜遇
君開筵當九日泛菊外浮雲朗詠山川霽酣歌物色曛
君看酒中意未肯喪斯文

柳子厚與韋中立書云古者重冠禮將以責成人之道
是聖人所尤用心者也數百年來人不復行近有孫昌
胤者獨發憤行之既成禮明日造朝到外廷薦笏言於
鄉士某子冠畢應之者咸憮然京兆尹鄭叔則怫然曳

笏却立曰何預我耶廷中皆大笑天下不以非鄭尹而快孫子何哉獨為所不為已

昌胤登天寶進士第

巖休復

楊州唐昌觀玉蕊花折有仙人遊悵然成二絕云終日齋心禱玉宸魂銷目斷未逢真不如滿樹瓊瑤蕊笑對藏花洞裏人

羽車潛下玉龜山塵世何由覩愛顏唯有無情枝上雪

好風吹綴綠雲鬟

元和中見一女子從以二女冠三小僕直造花所佇立
良久命小童折花數枝謂黃冠者曰曩有玉峯之期自
此可以行矣行百許步遂不復見休復有詩元微之和
云弄玉潛過玉樹時不教青鳥出花枝的應未有諸人
覺只是嚴郎卜得知

樂天詩云羸女偷乘鳳下時洞中潛歇弄花枝不緣啼
鳥春饒舌青瑣仙郎可得知

朱慶餘

慶餘遇水部郎中張籍知音索慶餘新舊篇什留二十
六章置之懷袖而推贊之時人以籍重名皆繕錄諷詠
遂登科慶餘作閨意一篇以獻曰洞房昨夜停紅燭待
曉堂前拜舅姑粧罷低聲問夫婿畫眉深淺入時無籍
酬之曰越女新粧出鏡心自知名豔更沉吟齊紈未足
門人貴一曲菱歌敵萬金由是朱之詩名流於海內矣
中秋月詩自古分功定唯應缺又盈一宵當皎潔四海

盡澄清靜覺風微起寒過雪乍傾孤高希此遇吟賞倍
牽情

題薔薇花云四面垂條密浮雲入夏清綠攢傷手刺紅
墮斷腸英粉著蜂鬚膩光凝蝶翅明雨中看亦好况復
值初晴

送韋校書赴浙東幕云丞相辟書新秋闕獨去人官離
芸閣早名占甲科頻水驛迎舡火山城候吏塵湘邊寄
家處到日倍榮親

慶餘名可久以字行登寶應進士第滿酌勸僮僕好隨
郎馬蹄花時慎行李莫上白銅鞮句

又題王侯廢宅云古巷戟門誰舊宅早曾聞說屬官家
更無新燕來巢屋唯有閑人去看花空廡欲摧塵滿櫪
小池初涸草侵沙繁華事歇皆如此立馬踟躕到日斜
右張為取此作主客圖

姚合送慶餘越州歸覲云鄉書落姓名太守拜親榮訪
我波濤郡還家霧露城海山空外遠鏡水世間清何計

隨君去鄰牆閑此生

張籍送慶餘歸越云東隣歸路遠幾日到鄉中有寺山
皆遍無家水不通潮聲蓮葉雨野氣稻苗風州縣知名
久爭邀與客同

劉軻

軻為僧時葬遺骸夢一書生來謝持三雞子勸食之嚼
一而吞二後精儒術任史官退之欲為文贊之會貶不
就

玉聲如樂詩云玉振能旋止人言與樂并繁音忽已闕
雅韻詘然清珮想停仙步泉疑咽夜聲曲終無異韻聽
罷有餘情特達知難擬玲瓏豈易名崑山如可得一片
佇為榮

撫言云軻慕孟軻為文故以名焉少為僧止於豫章高
安之南果園復求黃老之術隱於廬山既而進士登第
文章與韓柳齊名

軻上座主書曰軻本沛上耕人代業儒為農人家天寶

未流離於邊徙貫南鄙邊之人嗜習翫味異乎沛然亦未嘗輟耕捨學與邊俗齒且曰言忠信行必果雖夷貊行矣故處邊如沛然貞元中軻僅能執經從師元和初方結廬於廬山之陽日有芟夷畚築之役雖震風凌雨亦不廢力大耨或農圃餘隙積書牕下日與古人磨礱前心歲月悠久寢成書癖

樂天云廬山自陶謝後貞元初有符載楊衡輩隱焉今讀書屬文結茅崑谷者猶一二十人其中秀出者有彭

城劉軻開卷慕孟軻為人秉筆慕楊雄司馬遷為文軻
志不息異日必能跨符楊而攀陶謝矣

軻字希仁元和未登進士第卒於洛州刺史與吳武陵

並以史才直史館

不知為僧者是
彭城劉軻否

獨孤鉉

日南至云玉歷班窮律凝陰發一陽輕暉猶惜短桂影
叱偏長晷度經南斗流晶盡北堂乍疑周戶耀可愛逗
林光積雪消微照初萌動渺茫更昇臺上望雲物已昭

彰

鉉登元和進士第

張燦

寒食遣懷云繁華泣清露悄悄落衣巾明日逢寒食春
風見故人病來羞帶楚西去欲迷秦憔悴此時夜青山
歸四隣

燦貞元元和間進士也

楊虞鄉

過小妓英英墓云蕭晨騎馬出皇都聞說埋冤在路隅
別我已為泉下土思君猶似掌中珠四弦品柱聲初絕
三尺孤墳草已枯蘭質蕙心何所在焉知過者是狂夫
樂天夢得皆有和章

樂天云人間有夢何曾入泉下無家豈是歸墳上少啼
留取淚明年寒食更霑衣

夢得云但見好花皆易落從來尤物不長生鸞臺夜直
衣衾冷雲雨無因入禁城

虞卿醉後善歌掃市詞又有小妓攻琵琶虞卿死遂辭
去樂天哭虞卿詩云何日重聞掃市歌誰家收得琵琶
妓

虞卿字師臯虢州人佞柔善諧麗宗閔僧孺相穆宗引
為右司郎中宗閔倚之時號黨魁為京兆尹以罪貶虔
州司戶參軍死

楊汝士

唐名族重京官而輕外任汝士建節後詩云拋却弓刀

上砌臺上方樓殿翠雲開山僧見我衣裳窄知道新從
戰地來又云而今老大騎官馬羞向關西道姓楊

寶歷中楊於陵僕射入覲其子嗣復率兩榜門生迎於
潼關宴新昌里第僕射與所執坐正寢嗣復領諸生翼
兩序元白俱在賦詩席上汝士詩後成元白覽之失色
詩曰隔坐應須賜御屏盡將仙翰入高冥文章舊價留
鸞掖桃李新陰在鯉庭再歲生徒陳賀宴一時良吏盡
傳馨當時疏廣雖云盛詎有茲筵醉醪醕其日大醉歸

謂其子弟曰吾今日壓倒元白

時為刑侍

開成中汝士以戶

侍檢校尚書鎮東川時樂天以太子少傅分洛戲代內
子賀兄嫂曰劉綱與婦共登仙弄玉隨夫亦上天何似
沙哥領崔嫂碧油幢引向東川又云金花銀椀饒兄用
罽畫羅裙任嫂裁嫁得黔婁為妹婿可能空寄蜀茶來
裴令公居守東洛夜宴半酣公索句元白有得色時公
為破題次至汝士曰昔日蘭亭無艷質此時金谷有高
人白知不能加遽裂之曰笙歌鼎沸勿作冷澹生活元

顧曰樂天所謂能全其名者也

汝士鎮東川其子知溫及第命妓張宴人與紅綾一疋
詩曰郎君得意正青春蜀國將軍又不貧一曲高歌紅
一疋兩頭娘子謝夫人

汝士字慕巢牛李待之善開成初鎮東川時嗣復鎮西
川乃族昆弟對擁節旄世榮其門終刑部侍郎

張志和

漁父詞云西塞山前白鷺飛桃花流水鱖魚肥青蕩笠

綠蓑衣斜風細雨不須歸又云釣臺漁父褐為裘兩兩
三三舸舫舟能縱掉慣乘流長江白浪不曾憂又云雪
溪灣裏釣魚翁舸舫為家西復東江上雪浦邊風笑着
荷衣不歎窮又云松江蟹舍主人歡菰飯蓴羹亦共食
楓葉落荻花乾醉宿漁舟不覺寒又云青草湖中月正
圓巴陵漁父棹歌連釣車子橈頭船樂在風波不用仙
憲宗時畫玄真子像訪之江湖間不可得因令集其詩
上之玄真之兄張松齡懼其放浪而不返也和答其漁

父云樂在風波釣是閑草堂松逕已勝攀太湖水洞庭
山狂風浪起且須還

志和字子周婺州人母夢楓生腹上而產志和十六擢
明經肅宗時以事貶南浦尉不復仕居江湖自稱煙波
釣徒著元真子兄鶴齡恐其遁世為築室越州東郭與
陸羽往還憲宗圖真求其歌不能致李德裕稱志和隱
而有名顯而無事不窮不達嚴光之比云

唐詩紀事卷四十六

欽定四庫全書

唐詩紀事卷四十七

宋 計敏夫 撰

謝良輔

鮑防

杜奕

邛丹

嚴維

鄭棨

陳元初

呂渭

范燈

樊珣

劉蕃

賈奔

沈仲昌

李祐

李播

蕭靜

崔子向

李逢吉

楊乘

謝良輔

自良輔至沈仲昌有相會作憶
長安十二詠因載他詩於其後

憶長安十二詠云憶長安正月時和風喜氣相隨獻壽
彤庭萬國燒燈青玉五枝終南徃徃殘雪渭水處處流
澌

又云憶長安臘月時溫泉彩仗新移瑞氣遙迎鳳輦日
光先暖龍池取酒蝦蟇林下家家守歲傳卮

狀江南十二詠云江南孟冬天荻穗軟如綿綠絹芭蕉
裂黃金橘柚懸

太白與良輔遊涇川陵嵒寺詩云乘君素舸泛涇西宛

似雲門對若溪且從康樂尋山水何必東遊入會稽

良輔登天寶十一年進士第

德宗時刺商州
為團練所殺

又狀江南十二詠云江南仲春天細雨色如煙絲為武

昌柳布作石門泉

鮑防

憶長安十二詠云憶長安二月時玄鳥初至禰祠百轉
宮鶯繡羽千條御柳黃絲更有曲江勝地此來寒食佳
期

狀江南十二詠云江南孟春天
苜葉大如錢
白雪裝梅樹
青袍似葑田

防雜感詩云漢家海內承平久
萬國戎王皆稽首
天馬常銜苜蓿花
胡人歲獻蒲萄酒
五月荔枝初破顏
朝離象郡夕函關
鴈飛不到桂陽嶺
馬走皆從林邑山
甘泉御果垂仙閣
日暮無人香自落
遠物皆重近皆輕
雞雖有德不如鶴

防字子慎襄陽人
正元初為禮侍策賢良
方正得穆質

裴復柳公綽歸登崔邠韋純魏宏簡熊執易世美防知
人防於詩尤所感發以譏切當世與中書舍人謝良弼
友善號鮑謝

送薛補闕入朝云平原門下十餘人獨受恩多未殺身
每嘆漢家兄弟少更憐楊氏子孫貧柴門豈斷施行馬
魯酒那堪醉近臣賴有軍中遺令在猶將談笑對風塵

杜奕

憶長安十二詠云憶長安三月時上苑遍是花枝青門

幾場送客曲水竟日題詩駿馬金鞭無數良辰美景追
隨

卹丹

憶長安十二詠云憶長安四月時南郊萬乘旌旗嘗耐
玉卮更獻含桃絲籠交馳芳草落花無限金張許史相
隨

狀江南十二詠云江南季冬月紅蠟大如鯿湖水龍為
鏡爐峰氣作煙

韋蘇州秋夜寄丹云懷君屬秋夜散步詠涼天山空松
子落幽人亦未眠

丹和云露滴梧葉鳴秋風桂花發中有學仙侶吹簫弄
明月

蘇州又贈丹云跡與孤雲遠心將野鶴俱那同石氏子
每到府門庭

丹和云久作煙霞侶暫將簪組親還同褚伯玉入館忝
州人

蘇州聽江笛送陳侍御云遠聽江上笛江上笛若君還
愁獨宿客更向郡齋聞

丹和云離樽聞夜笛寥亮入塞城月落車馬散悽惻主
人情

蘇州送邛員外還山詩云長棲白雲表暫訪高齋宿還
辭郡邑諠歸泛松江淥結茅隱蒼嶺伐薪響深谷同是
山中人不知往來躅靈芝非庭草遼鶴委池鷺終當書
里門一表高陽族

丹酬云側聞郡守至偶乘黃犢出不別桃源人一見經
累日蟬鳴念秋稼蘭酌動離愁臨水降麾幢野艇纔容
膝參差碧山路目送江帆疾涉海得驪珠棲梧慙鳳質
媿非鄭公里歸掃蒙籠室

蘇州重送卍二十二還臨平山居云歲中始再見方來
又解携纔留野艇語已憶故山棲幽澗人夜汲深林鳥
長啼還持郡齋酒慰子霜露淒

丹和云賣藥有時至自知往來踈遽辭池上酌新得山

中書步出芙蓉府歸乘轂觶車猥蒙招隱作豈愧班生
廬此丹迷懷之作

丹隱臨平山與韋蘇州往還韋有詩贈丹云高詞棄浮
靡正行表鄉閭未值南宮拜聊偃東山居

中元日鮑端公宅遇吳天師聯句云道流為柱史教戒
下真仙嚴維共契中元會初修內景篇鮑防遊方依地僻卜

室喜塲連謝良輔寶笥開金錄華池漱玉泉杜奕恠龍隨羽

翼青節降雲煙李清昔去遺丹竈今來變海田劉蕃養形奔

二景練骨度千年

謝良輔

騎竹投陂裏携壺挂牖邊

鄭澗

中嘗入靜河上舊談玄

陳允初

伊洛笙歌遠蓬壺日月偏

樊洵

青驪蒞訓引白犬伯陽牽

卬丹

法受相君後心存象帝

先

呂渭

道成能縮地功滿欲昇天

范滄

何意迷孤性含情戀

數賢

吳筠

鮑防代宗時以御史大夫歷福建江西觀察使呂渭大
歷間為浙西支使大歷末貶歙州司馬觀十二月詩與
中元聯句皆在江南時事也詠江南而憶長安其意可

見矣

嚴維

憶長安十二詠云憶長安五月時君王避暑華池進膳
甘瓜朱李續命芳蘭綵絲競處高明臺榭槐陰柳色通
達

狀江南十二詠云江南春季天萼葉細如絃池邊草作
逕湖上葉如船

維字正文越州人與劉長卿善長卿對酒寄維云陋巷

喜陽和衰顏對酒歌懶從華髮亂閑住白雲多郡簡容
垂釣家貧學弄梭門前七里瀨早晚子陵過維答云蘇
耽佐郡時近出白雲司藥補清羸疾窻吟絕妙詞柳塘
春水漫花塢夕陽遲欲識懷君意朝朝訪檝師

時劉為睦州司

馬

維作越之諸暨尉劉隨州以詩送云愛爾文章逸還家
印綬榮退公兼色養臨下帶鄉情喬木映官舍春山宜
縣城應憐釣臺石閑却為浮名

維留別云中年從一尉自笑此身非道薄甘微祿時艱
耻息機晨趨本郡府晝掩故山扉待見干戈畢何妨更
採薇

題靈一上人院新泉云山下新泉出泠泠比法源落花
纔有響濺石未成痕獨映孤松色難分衆鳥喧唯當津
月夜觀定此禪門

送薛尚書入朝云卑情不敢論拜首入轅門列郡諸侯
長登朝八座尊凝笳臨水發行旆向風翻幾許遺民泣

同懷父母恩

哭靈一上人云一公何不住空有遠公名共說岑山路
今時莫可行舊房松更老新塔草初生經論傳緇侶文
章遍墨鄉禪床枝榦折法宇棟梁傾誰復修僧史應知
傳已成

長鄉送維赴河南充嚴中丞幕府云久別耶溪客來乘
使者軒用才榮入幕扶病喜同樽山屣留何處江帆去
獨翻暮情辭鏡水愁夢識雲門蓮府開花萼桃源寄子

孫何當舉嚴助偏沐漢朝恩

維贈別云早見登郎署同時跡下僚幾年江路永今日
國門遙文變騷人體官移漢帝朝望山吟度日接枕話
通宵萬里趨公府孤帆恨信潮康時知己老聖代耻逃
堯

長鄉蛇浦月下重送云秋風颭颭鳴條風月相和寂寥
黃葉一離一別青山暮暮朝朝寒江漸出高岸老樹猶
依斷橋明日行人已遠空餘淚逐歸潮

維重別云月色今宵最明庭閑夜久天清愁靜多年左
宦殷勤遠別深情溪臨脩竹煙色風落高梧雨聲耿耿
相看不寐遙聞擊柝山城

長鄉七里瀨重送云秋江渺渺水空波越客孤舟欲榜
歌手折衰楊悲老別故人零落已無多

維重別云新安非故枉帆過海內如君有幾何醉裏別
時秋水色老人南望一狂歌

錢起送維尉河南云蕙葉青青花亂開少時趨府下蓬

萊甘泉未獻楊雄賦吏道何勞賈誼才征陌獨愁雲蓋
遠離筵只惜暝鐘催欲知別後相思處願植瓊林向栢
臺維終校書郎

鄭槩

憶長安十二詠云憶長安六月時風臺水榭逶迤朱果
雕籠香透分明紫禁寒隨塵驚九衢客散赭汗滴瀝青
驪

司空曙寄槩詩云倦枕欲徐行開簾秋日明手便筇杖

冷頭喜葛巾輕綠草前侵水黃花半上城虛銷此風景
不見十年尤

狀江南十二詠云江南孟秋天稻花白如氈素腕慙新
藕殘粧妬晚蓮

陳元初

憶長安十二詠云憶長安七月時槐花點散果罌七夕
針樓競出中元香供初移繡轂金鞍無限遊人處處歸
隨

僧靈一有送元初卜居麻源詩云欲向麻源隱能尋謝
客蹤空山幾千里幽谷第三重崑宇寧須葺荷衣不待
縫因君見往事為我謝喬松

陳孫移耶溪舊居呈陳元初校書云雞犬漁舟裏長謠
任興行即令邀客醉已被遠山迎書笈將非重荷衣着
甚輕謝安無箇事忽起為蒼生

呂渭

憶長安十二詠云憶長安八月時闕下天高舊儀衣冠

共頌金鏡犀象對舞丹墀更愛終南灞上可憐秋草碧
滋

狀江南十二詠云江南仲冬天紫蔗節如鞭海將鹽作
雪山用火耕田

渭貞元十一年知貢舉撓悶不能定去留寄詩前主司
曰獨坐貢闈裏愁多芳草生仙翁昨日事應見此時情
中書省柳久枯死興元二年車駕還柳再榮謂之瑞柳
明年渭以為禮部賦題德宗甚惡之

渭字君載河中人德宗時為禮部侍郎與裴延齡姻家擢其子上第出為潭州刺史卒

范燈

憶長安十二詠云憶長安九月時登高望見崑池上苑初開露菊芳林正獻霜梨更想千門萬戶月明砧杵參差

狀江南十二詠云江南季夏天身熱汗如泉蚊蚋成雷澤袈裟作水田

樊珣

憶長安十二詠云憶長安十月時華清士馬相馳萬國
來朝漢闕五陵共臘秦祠晝夜歌鐘不歇山河四塞京
師

狀江南十二詠云江南仲夏天時雨下如川盧橘垂金
彈甘蕉吐白蓮

劉蕃

憶長安十二詠云憶長安子月時千官賀至丹墀御苑

雪開瓊樹龍堂冰作瑤池獸炭氈爐正好貂裘狐白相
宜

狀江南十二詠云江南季秋天粟熟大如拳楓葉紅霞
翠蘆花白浪川

蕃登天寶六年進士第

賈弇

狀江南十二詠云江南孟夏天慈竹笋如編蜃氣為樓
閣蛙聲作管絃

弇登大歷進士第椰子厚先友誌云弇長樂人善士也
為校書郎卒

李益送校書賈弇東歸寄振上人詩云北風吹鴈數聲
悲況指前林是別時秋草不堪頻送遠白雲何處更相
期山隨匹馬行看暮路入寒城獨去遲為向東州故人
道江淹已擬惠休詩

沈仲昌

狀江南十二詠云江南仲秋天鱣鼻大如船雷是樟亭

浪苔為界石錢

仲昌登天寶九年進士第蕭穎士送劉方平沈仲昌秀才同觀所試雜文云山東茂異有河南劉方平臨汝沈仲昌以郡府計偕之尤當禮闈能賦之試餘勇待賈未始踰辰吾徒相與登羣玉咀遺芳目臨雲外思入神境佳哉樂乎意數子之出幽谷而漸于陸矣

李祐

袁江口懷王司勳王吏部云京華不啻三千里客淚如

今一萬雙若箇最為相憶處青楓黃竹入袁江
唐宗室也大歷元和間江南錄事參軍纂之子

李播

見志云去歲買琴不與價今年沽酒未還錢門前債主
鴈行立屋裏醉人魚貫眠

播登元和進士第

播以郎中典蘄州有李生携詩謁之播曰此吾未第時
行卷也李曰頃於京師書肆百錢得此遊江淮間二十

餘年矣欲幸見惠播遂與之因問何往曰江陵謁盧尚書播曰公又錯也盧是某親表李慚悚失次進曰誠若郎中之言與荆南表文一時乞取再拜而出

蕭靜

三湘有懷云柳絮飛來別洛陽梅花落後到三湘世情已逐浮雲散離恨空隨江水長

崔子向

上鮑大夫云行盡江南塞北時無人不誦鮑家詩東堂

桂樹何年折直到如今少一枝

鮑防貞元時人

送惟詳律師自越之義興云陽羨諸峯頂何曾異剡山
雨晴人到寺木落夜開闢縫衲紗燈晃看心錫杖閑西
方知有社未得與師還

子向貞元以前為監察御史終南海從事裴鉶傳奇云
子向之子煒貞元中人居南海

李逢吉

送令狐秀才赴舉云子有雄文藻思繁齧年射策向金

門前隨鸞鶴登霄漢却望風沙走塞垣獨憶忘機陪出
處自憐何力繼飛翻那堪兩地生離緒蓬戶長扃行旅
喧

和嚴揆省中宿齋遇令狐員外當直之作云致齋分直
宿南宮越石盧諶此夜同位極班行猶念舊名題章奏
亦從公曾驅爪士三邊靜新贈髯參六義窮竟夕文昌
知有月可憐如在庾樓中

望京臺上寄令狐華州云祇役滯南服頽思屬暮年閑

上望京臺萬山蔽其前落日歸飛翼連翩東北天涪江
適在下為我久潺湲中葉成文教德威清遠邊頌條信
徒爾華髮生蒼然寄懷三峯守岐路隔雲煙

奉酬忠武李相公見寄云直繼先朝衛與英能移孝友
作忠貞劔門失險曾縛虎淮水安流緣斬鯨黃閣碧幢
惟是儉三公二伯未為榮惠連忽贈池塘句又遣羸師
破膽驚

酬致政楊祭酒見寄云初還相印罷戎旃獲守皇居在

紫煙妄比鄴侯功，茂爾每懷踈傳意。悠然應將半俸霑，
閭里料入中條訪洞天。十載別離那可道，倍令驚喜見
來篇。

逢吉與令狐楚有唱和詩曰：斷金集裴夷直為之序云：二相未遇時，每有所作必驚流輩，不數年遂壓秉筆之士。及入官，登高益復隆高，我不求異，他人自遠。逢吉卒，楚有題斷金集詩云：一覽斷金集，載悲埋玉人。牙絃千古絕，珠淚萬行新。

楊乘

甲子歲書事時上黨用兵討賊云豎子未昂烹大君尚
盱食風雷隨出師雲霞有戰色犒功椎萬牛募勇懸千
帛武士日曳柴飛將競執馘喜氣迎捷書懽聲送羽檄
天兵日雄強桀犬稍離析賊臂既已斷賊喉既已搯樂
禍但鯨鯢同惡惟肘腋小大勢難侔逆順初不敵違命
固天亡恃險乖長策蠱毒久萌牙狼顧非日夕禮貌忽
驕狂疏奏遂指斥動衆豈佳兵含恐恐無益鴻恩既已

孤小效不足惜腐儒一鈎刀投筆時感激帝閭不敢干
恹恹坐長晝

南徐春日懷古云六代驕奢地三春物象繁靈湖通漲
海天整隔中原曉渡高帆駛陰風巨艦翻旌旗西日落
戈甲夏雲屯豹變資陳武龍飛擁晉元風流前事盡文
物舊儀存邪侮嘗移潤忠貞幾度寃興亡山兀兀今古
水渾渾露暖蜂偷藥鶯啼日到軒酒腸堆麴蘖詩思遶
乾坤愁夢全無蝶離憂每愧萱形骸勞大塊玉石任炎

崑出處寧由已升沉未足言且應中聖樂坐起任昏昏
建鄴懷古云故城故壘滿江濱盡是干戈舊苦辛見此
即須知帝力生來便作太平人

吳中書事云十萬人家天塹東管絃臺榭滿春風名歸
范蠡五湖上國破西施一笑中香逕自生蘭葉小響廊
深映月華空樽前多暇但懷古盡日愁吟誰與同勝句
云自怜乖拙兩何如晝泥琴聲夜泥書數拍胡笳彈未
熟故人新命畫胡車

乘甲子年書事乃會昌四年討劉稹也張為作主客圖以白樂天為廣大教化主而以乘為入室之上

乘宣宗大中初登第官終殿中侍御史楊維直四子發假收嚴發以春為義其子以祝以乘為名假以夏為義其子以照為名收以秋為義其子以鉅鱗鑑為名嚴以冬為義其子以注涉澗為名皆以文學登第時號修行楊家與靖恭諸楊比於華盛

唐詩紀事卷四十七

欽定四庫全書

唐詩紀事卷四十八

宋 計敏夫 撰

李秘

韋臯

李德裕

鄭還古

裴航

裴休

呂羣

徐商

王傳

韋渠牟

陸長源

盧宗回

劉闢

薛宜僚

陸希聲

崔季卿

皇甫澈

李秘

禁中送任山人云子去非長往君恩取大還補天留彩
石縮地入青山獻壽千年外來朝數月閑莫拋殘藥物
切欲駐童顏

唐宗室也元和貞元時人

韋臯

臯少遊江夏止於姜使君之館有小青衣曰玉簫纔十
許歲常侍臯臯後告別與約後會因留玉指環一枚并
詩寄情云黃雀銜來已數春別時留解贈佳人長江不

見魚書至為遣相思夢入秦

李德裕

元和十一年歲在丙申李逢吉下三十三人皆取寒素
時有語曰元和天子丙申年三十三人皆得仙袍似爛
銀文似錦相將白日上青天德裕頗為寒素開路及謫
官南去或有詩曰八百孤寒齊下淚一時回首望崖州

出據
言

上已憶江南禊事云黃河西繞郡城流上已應無被禊

遊為憶淶江春水色更隨宵夢向吳州德裕營平泉莊
遠方以異物奉之或題曰隴右諸侯供語烏日南太守
送名花

及譴責或作詩云肉視具寮忘七著氣吞同列削寒溫
當時誰是承恩者肯有餘波達鬼村之句又云畫閣不
開梁燕去朱門罷掃乳烏歸千崑萬壑應惆悵流水斜
傾出武闈蓋恨之也

公離東都平泉有詩云十年紫殿掌洪鈞出入三朝一

品身文帝寵深陪雉尾
武皇恩重燕龍津
黑山永破和親虜
烏嶺全坑跋扈臣
自是功高臨盡處
禍來名滅不由人

公漢州日夕遊房公西湖云丞相鳴琴地何年黯玉徽

房公好琴聲聞海內

偶因微月夕重敞故樓扉桃李蹊空在芙蓉

客暫依唯怜濟川楫長與夜舟歸重題云晚日臨寒渚
微風發櫂謳鳳城波自闊魚水運難留亭古思宏棟川
長憶濟舟想公高世志祇似化城游

房公舊竹亭聞琴緬慕風流神期如對有作云流水音
長在青霞意不傳獨悲形解後誰聽廣陵絃

德裕論文曰沈休文以音韻為切重輕為難語雖甚工

旨則未遠未可以言文外意也古之辭高者蓋以言妙

而工適情不取於音韻

曹植七哀詩有西沉諧依四韻
王粲有舉原安三韻班固多用

協韻猗歟元勳佐
漢舉信是也矣

意盡而止成篇不拘於隻耦

文選有五韻七

韻十一
韻者

故篇無足尤詞寡累句古辭如金石琴瑟尚於

至音今則如絲竹鞞鼓迫於促節即知聲律之為其弊

也世有非文章者曰詞不出於風雅思不越於離騷摸
鴈古人何足貴也余曰譬諸日月雖終古常見而光景
嘗新此所以為靈物者也嘗為文箴曰文之為物自然
靈氣惚恍而來不思而至杼軸得之澹而無味琢刻藻
繪彌不足貴如彼璞玉磨礱成器奢者為之錯以金翠
美質既彫良寶斯棄此文之大旨也

劉三復謂德裕曰漁歌樵唱皆傳述作北夢述夢詩云
賦命誠非薄良時幸已遭君當堯舜日官接鳳凰曹目

睇煙霄闊心驚羽翼高

此六句夢中作

倚梧連鶴禁埤坵接龍

韜

內署北連春宮西接羽林軍

我后憐詞客

先后朝曾宣諭卿等是我門客

吾僚並

雋髦著書同陸賈待詔比王褒重價隣玄壁英辭濟寶

刀泉流初落澗

文賦稱言泉流於脣齒

露滴更濡毫赤豹忻來獻

彤弓喜暫橐

時西戎乞盟幽鎮二帥束身赴闕海內非無事者累月詩稱赤豹黃熊蓋真也

煙含瑞氣馴雉潔霜毛靜室便幽獨虛樓散鬱陶

學士院有

一室西南有小樓時燕語於此

花光晨豔豔松韻晚騷騷畫壁看飛鶴

山圖見巨鼇

內署垣牆皆有畫松鶴先是西壁畫海內曲龍山憲宗欲臨幸中使懼而圖焉

傍

簷陰藥樹落落萸蒲萄

此八句悉是內署物色
唯曾遊者依然可想也

荷靜蓬

池膾冰寒郢水醪

每學士初上賜食皆蓬菜池魚膾夏
至後頒賜冰及燒香酒以酒味稍濃

常和冰而飲

禁中有酒方

荔芰來自遠盧橘賜常叨

先朝初臨御南
方曾獻荔芰亦

蒙頒賜自後
以道遠罷獻

麝氣隨蘭澤霜華入杏膏恩光唯覺重携

挈未為勞扇迴交綵翟鷗起颺銀條轡待袁絲攬書期

蜀客操盡規徒蹇蹇退舍尚怵怵

此八句述
內庭所觀

龜顧垂金

鈕鸞飛曳錦袍御溝楊柳弱天廐驕驕豪屢換青春直

閑隨上苑遨煙低行殿竹風折繞垣桃

此八句述
澣日遊戲

聚散

俄成昔悲愁益自熬每懷仙駕遠更望茂陵號地接三

茅嶺川迎伍子濤

代稱海濤是伍子胥憤氣所作

花迷瓜步暗石固菘

山牢蘭野凝青管梅洲動翠篙泉魚驚綵妓溪鳥避干

菴感舊心猶絕思歸首更搔無聊燃密炬誰復勸金舸

余自到此絕無夜宴酒器中大者呼為舸賓僚乃常顧形迹未嘗以此而相勸也

嵐氣朝生棟

城陰暝入濠望煙歸海嶠送鴈度江臯宛馬嘶寒樞吳

鉤在錦笈未能追狡兔空覺長江蒿水國逾千里風帆

過萬艘閱川終古恨唯見暮滔滔

德裕述夢詩記為夢中賦詩耳元微之和云聞有池塘
什還因夢寐遭攀禾占類蔡詠豆放過曹莊蝶玄言秘
羅禽藻思高注云本篇稱六句皆夢中作故此三聯多
證夢意已下皆言同在翰林及翰苑故事若學士初入
賜龍飛馬故有借騎銀杏葉之句青詔用麥紋紙故有
麥紙侵紅點之句麻制例別通宵勘寫故有蘭燈焰碧
高之句學士密邇銀臺每旦嘗聞門使勘契開鎖又院
門有急命即鈴索門自搖習以為異故有吏傳開鎖契

神撼引鈴條之句學士無過從聚會之例時與李閑行
寺觀而已故有分阻盃盤會閑期寺觀邀之句乃皆唐
之故事也

鄭還古

還古閑居東都將入京赴選柳當將軍者餞之酒酣以
一詩贈柳氏之妓曰冶艷出神仙歌聲勝管絃詞輕白
紵曲歌遏碧雲天未擬生裴秀如何乞鄭元不堪金谷
水橫過墜樓前柳喜甚曰專伺榮命以此為賀未幾還

古除國子博士柳見除目即遣入京及嘉祥驛而還古物故乃放妓他適逸史載還古初娶柳氏女嘉會之初夢娶房氏後柳卒再娶東都李氏屬房直溫為東洛少尹李之舅也禮宴皆房主之始知舊夢之前定也

還古登元和進士第

裴航

長慶中裴航下第遊鄂渚傭舟還都有樊氏女同載航賂其侍兒以詩求達曰同為胡越猶懷思况遇天花隔

錦屏儻若玉京朝會去願隨鸞鶴入青冥樊答詩曰一
飲瓊漿百感生玄霜搗盡見雲英藍橋便是神仙宅何
必崎嶇上玉清世傳藍橋雲英之事未必信姑載於此

裴休

贈黃蘗山僧希運詩曰自從大士傳心印額上圓珠七
尺身挂錫十年棲蜀水浮盃今日渡漳濱一千龍象隨
高步萬里香華結勝因擬欲事師為弟子不知將法付
何人休會昌中官于鍾陵請運至郡以所解一篇示之

師不顧曰若形於紙墨何有吾宗休問其故曰上乘之
印唯是一心更無別法心體一空萬緣俱寂如大日輪
升於虛空其中照耀靜無纖埃證之者無新舊無淺深
說之者不立義解不開戶牖直下便是動念即乖其後
休錄之為傳心法要云

休字公美孟州人大中六年為相能文章為人醞藉進
止雍閑宣宗曰休真儒者

呂羣

羣元和十一年下第遊蜀性不容下僕馭怨之至眉州
題詩所寓寺之東壁其一云路行三蜀盡身及一陽生
賴有殘燈火相依坐到明其二曰社後辭巢燕霜前別
蒂蓬願為蝴蝶夢飛去覓關中吟訖淚下意緒不堪未
幾為其奴所殺

徐商

王傳

商鎮襄陽有副使節判同加章綬商以詩賀之云朱紫
花前賀故人兼榮此會頗關身同年坐上聯賓榻宗姓

亭中布錦裯晴日照旗紅灼爍韶光入隊影玢璘芳菲
解助今朝喜嫩蘂青條滿眼新

觀察判官將仕郎監察御史王傳和云朱紫聯輝照日
新芳菲全屬斷金人華筵重處宗盟地白雪飛時郢曲
春仙府色饒攀桂侶蓮花光讓握蘭身自憐亦是膺門
客吟想恩榮氣益振

朝議郎江州刺史段成式和云雲雨軒懸鶯語新一篇
佳句占陽春銀黃年少偏欺酒金紫風流不讓人連壁

坐中斜日滿貫珠歌裏落花頻莫辭倒載吟歸去看欲
東山又吐茵

商宣宗時為山南東道節度使咸通四年為宰相封東
莞縣子商與曹確楊收路巖同秉政有朝之者曰確確
無餘事錢財摠被收商人都不管貨賂幾時休

傳登大中三年進士第初貧窶於中條山萬固寺入院
讀書家廟碑云隨僧洗鉢

韋渠牟

貞元元年渠牟為大府卿與金吾李齊運度支裴延齡
京兆尹嗣道皆承恩寵薦人多得名位時劉老師穆寂
皆科目渠牟主穆寂齊運主老師會齊運朝對上嗟其
羸弱許以致仕而老師失據無名子嘲之云太尉朝天
外穆老尚書倒地落劉郎劉禹錫曰名場巖嶮如此出
古今詩話

渠牟南山四皓贊云煥煥煌煌為珪為璋孰光乎不耀
之光幽幽深深為山為林孰繫乎不繫之心足知乎虛

室生白玄門不關流水去住清風往還豈比乎稷契在
世巢由在山一物有累兩心不閑者哉閑之謂何簪裾
薜蘿本不干我豈云其他熙熙忻忻與時為春匡漢避
秦惟茲四人于德之濱不迷其津繪事後素孰知其故
想像儀刑念茲丹青曄曄紫芝深谷逶迤俛仰今古空
林往時鳳豈無德鸞皆有羣出處嘿語商山白雲

渠牟述之從子也少警悟攻為詩李白異之授以古樂
府去為道士不終更為浮屠已而復冠韓滉表試校書

郎德宗誕日詔徐岱趙需許孟容與渠牟及佛老二師
並對麟德殿質問大趣渠牟有口辯雖三家未究解然
答問鋒生帝聽之意動遷秘書郎後倚延齡為姦利勢
焰可炙擢太常卿卒權載之叙其文曰初君年十一嘗
賦銅雀臺絕句右拾遺李白見而大駭因授以古樂府
之學且以瓊琦軼拔為己任至弱冠乃喟然曰四始五
際今既遠矣會情性者因於物象窮比興者在於聲律
蓋辨以麗以則得於無間合於天倪者其在是乎彼惠

休稱謝永嘉如芙蓉出水鍾嶸謂范尚書如流風迴雪
吾知之矣遂苦心藻慮儷詞比事纖密清巧度越羣倫
嘗著天竺寺十六韻魯郡文忠公序引而和之使畫工
圖於仁祠摘句配境偕為勝絕又於江南著卧疾三十
韻晉國忠肅公手翰以美之曰草木獨立其在我韋生
乎其為名臣宗公所稱賞如此又與竟陵陸鴻漸杼山
僧皎然為方外之侶沉冥博約為日最久而不名一行
不滯一方故其曳羽衣也則曰遺名攝方袍也則曰塵

外披儒服也則今之名字著焉周流三教出入無際寄
詞詣理必於斯文

陸長源

孟東野以樂府戲贈云蓮子不可得荷花生水中猶勝
道傍柳無事蕩春風長源答云芙蓉初出水菡萏露中
花風吹著枯木無奈值空槎

東野有夷門雪贈主人云夷門貧士空吟雪夷門豪士
皆飲酒酒聲歡鬧入雲霄雪聲激切悲枯朽悲歡不同

歸去來萬里春風動江柳

長源答云好丹與素道不同失意得途事皆別東隣年
少樂未央南客思歸腸欲絕千里長河水復冰雲鴻冥
冥楚山雪

酬東野新居見寄云大道本夷曠高情亦冲虛因隨白
雲意偶逐青蘿居青蘿紛蒙密四序無慘舒餘情濯子
衿散彩還吾廬去歲登羨第榮名在公車將必繼管蕭
豈惟躡應徐首夏尚清和殘芳徧邛壚褰幃蔭窻柳汲

井滋園蔬達者貴知心古人不願餘愛君蔣生徑且著
茂陵書

長源吳人贍於學德宗以宣武節度使董晉懦弱詔長
源為司馬佐之持法峭刻晉卒長源總留後事軍亂殺
之

盧宗回

長安慈恩寺塔詩云東方曉日上翔鸞西轉蒼龍拂露
盤渭水冷光搖藻井玉峯晴色墮欄杆九重宮闕參差

見百二山河表裏觀暫輟去蓬悲不定一凭金界望長
安

宗回登元和進士第

劉闢

登樓望月云圓月當新霽高樓見最明素波流粉壁丹
桂拂飛蕙下瞰千門靜旁觀萬象生梧桐窻下影烏鵲
檻前聲嘯逸劉琨興吟資庾亮情遊人莫登眺迢遞故
鄉程

又云皎潔三秋月
巍峩百丈樓
下分征客路上有美人
愁帳卷芙蓉帶
簾褰玳瑁鈎
倚窻情渺渺
憑檻思悠悠
未得金波轉
俄成玉筋流
不堪三五夕
夫壻在邊州

闕字太初擢進士
宏詞科佐韋臯府
後為西川節度以
叛誅

薛宜僚

宜僚以左庶子充新羅冊贈使
至青州悅一妓段東美
賦詩曰阿母桃花方似錦
王孫草色正如煙
不須更向

滄溟望惆悵懽情又一年到外國謂判官苗甲曰東美何故頻見夢中數日而卒櫬至青段莫之一慟而卒

陸希聲

古之善書鮮有得筆法者希聲得之凡五字撇押鉤格抵用筆雙鉤則點畫遒勁而盡妙矣謂之撥鐙法希聲自言昔二王皆傳此法至陽冰亦得之希聲以授沙門詈光詈光入長安為翰林供奉希聲猶未達以詩寄詈光云筆下龍蛇似有神天池雷雨變逡巡寄言昔日不

龜手應念江頭泝人誓光感其言引薦希聲於貴倖
後至相

希聲博學善屬文相昭宗在位無所輕重以太子太師
罷李茂貞犯京師與疾避難卒

崔季卿

晴江秋望云八月長江萬里晴千帆一道帶風輕盡日
不分天水色洞庭南是岳陽城

季卿峒之從孫也

皇甫澈

貞元十四年澈刺蜀州賦四相詩序云蜀州刺史廳壁
記居相位者前後四公謨明弼諧遷轉歷此顧已無取
忝跡於斯景行遺烈嗟嘆之不足也謹述其行事詠其
休美庶將來君子知聖朝之德云爾

中書令漢陽王張柬之周歷革元命天步值艱阻烈烈
張漢陽左袒清諸武休明神器正文物舊儀覩南向翊

大君西宮朝聖母

借韻用
作補文

茂勲鏤鐘鼎鴻勞食茅土至

今稱五王卓立邁萬古

中書令鍾紹京景龍仙駕遠中禁奸釁結謀猷叶聖朝
披鱗奮英節清宮閭闔啓滌穢氛沴滅紫極重昭回皇
天新日月從容廟堂上肅穆人神悅唐元佐命功輝煥
何烈烈

禮部尚書門下侍郎平章事李峴時來偶明聖道濟寧
邦國猗歟瑚璉器竭我股肱力進賢黜不肖措枉舉諸
直宦官既却坐權豎亦移職載踐每若驚三已無愠色

昭昭垂憲章來世實作則

門下侍郎平章事王縉舟楫濟巨川山河資秀氣服膺
究儒業屈指取高位北征戮驕悍東守輯携貳論道致
巍巍持衡無事事知已不易遇宰相固有器瞻事華壁
中來者誰其嗣

唐詩紀事卷四十八

欽定四庫全書

集部

唐詩紀事卷四十九至五十一

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣劉能

欽定四庫全書

唐詩紀事卷四十九

宋 計敏夫 撰

胡杲

吉皎

劉真

鄭據

盧貞

張渾

白居易

項斯

龐蘊

蔡京

滕邁

郭周藩

殷潛之

裴思謙

何扶

鄭澣

廖有方

薛書記

賈耽

盧貞

姚合

胡杲

前懷州司馬安定
胡杲年八十九

九老會賦詩云閑居同會在三春大抵愚年最出羣霜
鬢不嫌盃酒興白頭仍愛玉爐薰徘徊玩柳心猶健老
大看花意却勤鑿落滿斟判酌酤香囊高掛任氤氳搜
神得句題紅葉望景長吟對白雲今日交情何不替齊
年同事聖明君

吉皎

衛尉鄉致仕馮翊
吉皎年八十八

九老會云休官罷任已閑居林苑園亭興有餘對酒最

宜花藻發邀歡不厭柳條初低腰醉舞垂緋袖擊筋謳
歌任褐裾寧用管絃來合雜自親松竹且清虛飛觥酒
到須先酌賦詠成詩不住書借問商山賢四皓不知此
後更何如

劉真

前磁州刺史廣
平劉真八十七

九老會云垂絲今日幸同筵朱紫居身是大年賞景尚
知心未退吟詩猶覺力完全閑庭飲酒連三月在席揮
豪象七賢山茗煮時秋霧碧玉盃斟處彩霞鮮臨堦花

笑如歌妓傍竹松聲當管絃雖未學窮生死訣人間豈
不是神仙

鄭據

前龍武軍長史榮
陽鄭據八十五

九老會云東洛幽閒日暮春邀懽多是白頭賓官班朱
紫多相似年幾高低次第勻聯句每言松竹意停盃多
說古今人更無外事來心肺空有清虛入思神醉舞兩
迴迎勸酒狂歌一曲會娛身今朝何事偏情重同作明
時列任臣

盧貞

前侍御史內供奉官
范陽盧貞八十三

九老會云三春已盡洛陽宮
天氣初晴景象中
千朵嫩桃迎曉日
萬株垂柳逐和風
非論官位皆相似
及至年高亦共同
對酒歌聲猶覺妙
玩花詩思豈能窮
先時共作三朝貴
今日猶逢七老翁
但願綠醪常滿酌
煙霞萬里會應通

張渾

前永州刺史清
河張渾七十七

九老會云幽亭春盡共為歡
印綬居身是大官
遁跡豈

勞登遠岫垂絲何必坐溪磻詩聯六韻猶應易酒飲三
盃未覺難每况襟懷同要會共將心事比波瀾風吹野
柳懸羅帶日照庭花落綺紈此席不煩鋪錦帳斯筵堪
作畫圖看

白居易

刑部尚書致仕年七十四

九老會云七人五百八十四拖紫紆朱垂白鬚囊裏無
金莫嗟嘆樽中有酒且歡娛吟成六韻神還王飲到三
盃氣尚粗蒐莪狂歌教婢拍婆婆醉舞遣孫扶天年高

邁二踈傳人數多於四皓圖除却三山五天竺人間此
會且應無

樂天退居洛中作尚齒九老之會其序曰胡吉劉鄭盧
張等六賢皆多壽餘亦次焉於東都弊居履道坊合尚
齒之會七老相顧既醉且歡靜而思之此會希有因各
賦七言韻詩一章以記之或傳諸好事者時會昌五年
二月二十四日樂天云其年夏又有二老年貌絕倫同
歸故鄉亦來斯會續命書姓名年齒寫其形貌附於圖

右與前七老題為九老圖仍以一絕贈之云雪作鬚眉
雲作衣遼東華表暮雙歸當時一鶴猶希有何況今逢
兩令威洛中遺老李元真年一百三十六禪僧如滿歸洛年九十五歲又云時秘書狄
兼謨河南尹盧貞以年未七十雖與會而不及列

項斯

斯字子遷江東人始未為聞人因以卷謁楊敬之楊苦
愛之贈詩云幾度見詩詩盡好及觀標格過於詩平生
不解藏人善到處逢人說項斯未幾詩達長安明年擢

上第蒼梧雲氣詩云何年盡作愁漠漠便難收數點山
能遠平鋪水不流濕連湘竹暮濃蓋舜墳秋亦有思鄉
客看來盡白頭

贈金州姚合使君云為郎名更重領郡是蹉跎官壁題
詩盡衙庭看鶴多城池連竹澗籬落帶椒坡未覺旌旛
貴閑行觸處過始張水部籍為律格詩惟朱慶餘親授
其旨汭流而下有任蕃陳標章孝標司空圖咸及門焉
寶歷開成之際斯尤為水部所知故其詩格與之相類

鄭少師薰云項斯逢水部誰道不關情斯留別水部詩
云省中重拜別兼領故人書已念此行遠不應相問踈
子城西並宅御水北同渠要取春前到乘閑候起居

佳人背江坐眉際列煙樹

庾樓燕句

馬蹄沒青莎船跡成空

波春風吹兩意何處更相值

古意

燭殘催卷席坐冷怕梳

頭寒入鴈聲長句右張為取於主客圖

張籍贈詩云端坐吟詩忘忍饑萬人中亦見君稀門連
野水風長到驢放秋原夜不歸日暖剝收新落葉天寒

更着舊生衣曲江亭上頻頻見為愛鷓鴣雨裏飛

龐蘊

蘊有詩云未識龍宮莫說珠識珠言說與君殊空拳只是嬰兒信豈得將來誑老夫又曰萬法從心起心生萬法生法生何日了來去在虛行寄語修道人空生慎勿生如能達此理不動出深坑

又曰極目觀前境寂寥無一人迴頭看後底影亦不隨身又曰神識苟能無罣礙廓周法界等虛空不假坐禪

持戒律超然解脫豈勞功

蘊字道元衡陽人嗜浮屠法厭離貪俗挈所有沉之洞庭鬻竹器以為生後居襄陽臨終召刺史于頔謂曰但願空諸所有慎勿實諸所無善住世間皆知影響言訖奄然而化時貞元間也世號龐居士

居士初參石頭和尚問師不與萬法為侶是什麼人石頭以手掩居士口居士豁然大悟石頭一日問居士云子自見老僧已來日用事作麼生居士云若問某甲日

用事直下無開口處石頭云知子什麼方始問子居士
遂呈一頌曰日用事無別惟吾自偶偕頭頭非取捨處
處勿張乖朱紫誰為號青山絕點埃神通并妙用運水
及搬柴石頭然之曰子將緇耶素耶居士曰願從所慕
遂不染剃

居士後之江南參見馬祖問不與萬法為侶是什麼人
祖云待你一口吸盡西江水即向汝道居士言下頓悟
宗要乃作頌曰十方同聚會箇箇學無為此是選佛場

心空及第歸

居士一日訪谷隱道者道者問云誰居士立起杖子隱云莫是上上機麼居士拋下杖子隱無語居士云只知道上上機不覺上上事隱云作麼生是上上事居士拈起杖子隱云不得草草居士云可憐強作主宰隱云有一機人不要拈搥豎拂亦不明對答言辭居士若逢如何則是居士云何處逢隱把住居士居士驀面便唾隱無語居士與一頌曰焰水無魚下底鈎覓魚無處笑君愁

可憐谷隱老禪伯被唾如何見亦羞

蔡京

邕州蔡大夫京者故令狐文公楚鎮滑臺日於僧中見
曰此童眉目踈秀進退不懾惜其單幼可以勸學乎師
從之乃得陪學於相國子弟後以進士舉上第尋又學
究登科作尉畿服既為御史覆獄淮南李相紳憂悸而
卒頗得繡衣之稱謫居澧州為厲員外玄所辱稍遷撫
州刺史以辭氣自負郡有汝水為放生池不許漁罟之

事忽一人乘小舟釣於此蔡遣吏捕釣者乃為詩曰拋
却長竿卷却絲手携蓑笠獻新詩臨川大守清如鏡不
是漁人下釣時京覽詩召之已去卒不言其姓字或曰
野人張頂也京益自驕矜作詩責商山四皓曰秦末家
家思逐鹿商山四皓獨忘機如何鬢髮霜相似更出深
山定是非及假節邕交道由吳溪傍惶賦詩久之詩曰
停橈積水中舉目孤煙外借問吳溪人誰家有山賣既
而殂於邕南藁殯此地亦有其兆矣詠子規云千年冤

魄化為禽永逐悲風叫遠林愁血滴花春豔死月明飄
浪冷光沉凝成紫塞風前淚驚破紅樓夢裏心腸斷楚
詞歸不得劍門迢遞蜀江深

劉夢得有送前進士蔡京赴學究科詩云已是世間能
賦客更攻窓下絕編書又云幸遇天官舊丞相知君無
翼上虛空蓋欲薦之時相也京以進士舉登學究科時
為好及第惡科名有錦上披蓑之諷焉

令狐文公在天平後堂宴樂京時在坐故義山詩云白

足禪僧思敗道青袍御史擬休官謂京曾為僧也或云
咸通中為廣西節度福恃貪克峻條令為炮熏剗斫法
御下慘毒為軍中所逐後貶死

滕邁

湖州崔芻言郎中初為越副戎宴席中有周德華者劉
採春女善歌楊柳枝詞所唱七八篇皆名流之詠滕邁
郎中一首云三條陌上拂金羈萬里橋邊映酒旗此日
令人腸欲斷不堪將入笛中吹賀知章秘監一首云碧

玉裝成一樹高萬條垂下綠絲條不知細葉誰裁出二
月春風似剪刀楊巨源員外一首云江邊楊柳麴塵絲
立馬憑君折一枝唯有春風最應惜殷勤更向手中吹
劉禹錫尚書一首云春江一曲柳千條二十年前舊板
橋曾與美人橋上別恨無消息到今朝韓琮舍人二首
云枝裊芳腰葉鬪眉春來無處不如絲灞陵原上多離
別少有長條拂地垂又曰梁苑隋堤事已空萬條猶舞
舊春風那堪更想千年後誰見楊花入漢宮

雲溪子曰杜牧舍人云巫娥廟裏低含雨宋玉堂前斜
帶風滕郎中又云陶令門前骨接羅亞夫營裏拂朱旗
俱不言楊柳二字取為妙也是以姚合郎中吟道傍亭
子詩云南陌遊人迴首去東林道者杖藜歸不稱亭而
意見矣邁登元和進士第

郭周藩

譚宜者陵州民叔皮子也開元末生而有異年二十餘
忽失所在大歷初年還家即霞冠羽衣真仙之流也言

訖而去其家靈泉湧出禱必有應因名譚子池亦曰天
池進士郭周藩為詩記其事曰澄水一百步世名譚子
池余詰陵陽叟此池當因誰父老謂余說本郡譚叔皮
開元末年中生子字阿宜墜地便能語九歲多鬢眉不
飲亦不食未嘗言渴飢十五銳行走快馬不能追二十
入山林一去無還期父母憶念深鄉閭為立祠大歷元
年春此兒忽來歸頭冠簪鳳凰身著霓裳衣普遍拯疲
俗丁寧告親知余為神仙官下界不可祈恐為妖魅假

不如早平夷此有黃金藏鎮在茲廟基發掘散生聚可
以救貧羸金出繼靈泉湛若清琉璃泓澄表符瑞水旱
無竭時言訖辭冲虛杳靄上玄微凡情留不得攀望衆
號悲尋稟神仙誠徹廟廡開窺果獲無窮寶均融沾困
危巨源出巔頂噴湧世間稀異境流千古終年福四維
周藩河東人登元和六年第

殷潛之

野人殷潛之題籌筆驛云江東矜割據鄴下奪孤發霸

略非匡漢宏圖欲佐誰
奏書辭後主仗劍出全師
重襲褒斜路懸開反正旗
欲將苞有截必使舉無遺
沉慮經謀際揮毫決勝時
園觚當分畫前筋此操持
山秀扶英氣川流入妙思
筭成功在穀運去事終虧
命屈天方厭人亡國自隨
艱難推舊姓開創極初基
總歎曾過地寧探作教資
若歸新歷數誰復顧衰危
報德兼明道長留識者知

杜牧之和云三吳裂婺女
九錫獄孤兒霸王業未半本

朝心是誰永安宮受詔籌筆驛沉思畫地乾坤在濡毫
勝負知艱難同草創得失計毫釐寂默經千慮分明渾
一期川流縈智思山聳助扶持慷慨匡時略從容問罪
師褒中秋鼓角渭曲晚旄旗仗義懸無敵鳴攻固有辭
若非天奪去豈復慮能支子夜星纔落鴻都鼎便移郵
亭世自換白日事長垂何處躬耕者猶題殄瘁詩

裴思謙

思謙及第後作紅牋名紙十數詣平康里因宿於里中

詰旦賦詩曰銀缸斜背解鳴璫小語偷聲賀玉郎從此
不知蘭麝貴夜來新染桂枝香

思謙開成三年登上第

何扶

扶大和九年及第明年捷三篇因以一絕寄舊同年曰
金榜題名墨尚新今年依舊去年春花間每被紅粧問
何事重來只一人

鄭幹

和李德裕遊漢州房公湖云太尉留琴聽時移重可尋
徽絃一掩抑風月助登臨榮駐青油騎高張白雪音
言酬唱美良史記王箴

又云靜對煙波夕猶思棟宇精卧龍空有處馴鳥獨忘
情顧步襟期遠參差物象橫自宜雕樂石爽氣際青城
舊竹亭聞琴云石室寒飈鷺孫枝雅器裁坐來山水操
絃斷弔遺埃

澣餘慶之子文宗時為翰林學士進左丞出為山南西

道節度使以戶部尚書召卒文宗嘗為餘慶曰涵卿令子而朕直臣也可更相賀涵幹舊名以文宗故名改焉

廖有方

有方元和十年失意遊蜀至寶雞西界窆旅逝者書板記之曰余元和乙未歲落第西征適此聞呻吟之聲潛聽而微愒也問其疾苦住止對曰辛勤數舉未遇知音眇眇叩頭久而復語唯以殘骸相託餘不能言俄而逝余乃鬻所乘馬於村豪備棺瘞之恨不知其姓字臨歧

悽斷復為銘曰嗟君沒世委空囊幾度勞心翰墨場半
面為君申一慟不知何處是家鄉

明年李逢吉擢有方及第改名游鄉唐之義士也有方
交州人椰子厚以序送之

薛書記

元相公賓府有薛書記飲酒醉後因爭令擲注子擊傷
相公猶子遂出幕醒來乃作十離詩上獻府主

犬離主云馴擾朱門四五年毛香足淨主人憐無端咬

着親情客不得紅絲毯上眠

筆離手云越管宣毫始稱情紅牋紙上撒花瓊都緣用
久鋒頭盡不得羲之手裏擎

馬離廐云雪耳紅毛淺碧蹄追風曾到日東西為驚玉
貌郎君墜不得華軒更一嘶

鸚鵡離籠云隴西獨自一孤身飛去飛來上錦裯都緣
出去無方便不得籠中再喚人

鶯離巢云出入朱門未忍拋主人嘗愛語交交銜泥穢

污珊瑚簾不得梁間更壘巢

珠離掌云皎潔圓明內外通清光似照水精宮都緣一點瑕相穢不得終宵在掌中

魚離池云戲躍蓮池四五秋常搖朱尾弄輪鈎無端擺斷芙蓉朶不得清波更一遊

鷹離主云爪利如鋒眼似鈴平原捉兔稱高情無端竄向青雲外不得君王手上擎

竹離亭云蒼鬱新栽五行常將貞節負秋霜為緣春

筍鑽牆破不得垂陰覆玉堂

鏡離臺云鑄瀉黃金鏡始開初生三五月徘徊為遭無限塵蒙蔽不得華堂上玉臺

元公詩云馬上同携今日盃湖邊還折去年梅年年祇是人空老處處何曾花不開歌詠每添詩酒興醉酣還命管絃來樽前百事皆依舊點檢唯無薛秀才

賈耽

耽賦虞書歌云衆書之中虞書巧體法自然歸大道不

同懷素只攻顛豈類張芝惟劄草形勢素筋骨老父子
君臣相揖抱孤青似竹更颼颼闊白如波長浩渺能方
正不隳倒功夫未至難尋奧須知孔子廟堂碑便是青
箱中至寶

耽字敦詩貞元中為宰相

盧貞

字子蒙會昌五年為河南尹樂天九老會貞年未七十
亦與焉時又有內供奉盧貞貞和劉夢得歲夜懷云文

翰走天下琴樽卧洛陽貞元朝士盡新歲一悲涼名早
緣才大官遲為壽長時來知病已莫歎步趨妨

楊柳枝詞云一樹依依在永豐兩枝飛去杳無蹤玉皇
曾採人間曲應逐歌聲入九重

姚合

合宰相崇曾孫登元和進士第調武功主簿世號姚武
功又為富平萬年尉寶應中歷監察御史戶部外郎出
荆杭二州刺史後為給事中陝虢觀察使開成末終秘

書監與馬戴費冠卿殷堯藩張籍遊李頻師之合有極
玄集取王維等二十六人詩百篇曰此詩中射雕手也
移花蕪蝶至買石得雲饒句挿劍龍纏臂開旗火滿身
句家中去城遠日月在船多句身慙山友棄膽賴酒盃
扶句右張為主客圖取李益為清竒雅正主以合為入
室

酉陽雜俎言僧清教句云雷電下嵩陰故姚監常吟之
不輟又僧雲容句云木末上明星清教又有句云香連

鄰舍像荊州僧云犬熟護隣房

張籍寄合詩云病來辭赤縣案上有丹經為客燒茶竈
教兒掃竹亭詩成添舊卷酒盡卧空瓶闕下今遺逸誰
占隱士星

又寒食夜寄合云貧官多寂寞不異野人居作酒和山
藥教兒寫道書五湖歸去遠百事病來踈况是同懷客
寒應月上初

合酬張司業見寄云日日在心中青山青桂叢高人多

愛靜歸路亦應同罷吏方無病因僧得解空新詩勞見
問吟對竹林風

一日看除目終年損道心合之詩也

合為魏州從事寄耿拾遺云少在兵馬間長還繫戎職
雞飛不得遠豈要生羽翼三年城中遊與君最相識應
知我衷腸不苟念衣食主人樹功名欲滅天下賊愚雖
乏智謀願陳一夫力人生須氣健饑凍縛不得睡當一
席寬覺乃千里窄古人不懼死徒死亦無益至交不可

合一合難離拆君嘗相勸勉苦語毒宵臆百年心知同
誰限河南北

送張宗原詩云東門送客道春色如死灰一客失意行
十客顏色低住者既無家去者又非歸窮愁一成疾百
藥不可治子賢我且愚命分不合齊誰開蹇躓門日日
同遊棲子行何所之切切食與衣誰能買仁義令子無
寒饑野田不草草四向生路岐士人甚商賈終日須東
西鴻鴈春北去秋風復南飛勉君向前路無失相見期

武功縣閑居云縣去京城遠為官與隱齊馬隨山鹿放
雞雜野禽棲連舍惟藤架侵堦是藥畦更師嵇叔夜不
擬作書題

又云簿書多不會薄俸亦難銷醉卧慵開眼閑行懶繫
腰移花蕪蝶至買石得雲饒且自心中樂從他笑寂寥
又云日出方能起庭前看種莎吏來山鳥散酒熟野人
過岐路荒城少煙霞遠岫多同官更相引下馬上西坡
劔器云聖朝能用將破敵速如神插劔龍纏臂開旗火

滿身積屍川沒岸流血野無塵今日當場舞須知盡戰
人

方干哭姚監云入室幾人成弟子為儒是處哭先生又
上姚杭州云身貴久離行樂伴才高獨作後人師

唐詩紀事卷四十九